



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 10

Yangia anidakangma :

Tir Yimyim

tirymyim@aolima

tir yimyim

TAPAK 7

Thisara Perera-i over ka
nung six trok azük

Linük Tir Ram Nath Kovind-i NCT
Delhi (Amendment) Bill agizükogo

VOL. XVIII NO. 165 (ADOK 165) DIMAPUR

SANGTENNÜ (TUESDAY)

METSÜREMI (MARCH) 30, 2021

₹ 5.00

India kübok state 8 nung COVID-19 puteter 84% lir

Mumbai, March 29 (Agencies): India nung COVID-19 aliba puteter nisung 84.5% ji state 8 nung lir. Tesüiba ghonda 24 tsüingda nisung 68,020 dak putetogo, ta Hombarnü Union Health Ministry-i metetdaksü.

Tanü Maharashtra nung nisung 40,414 dak Covid-19 putet. Iba state sülen Karnataka nung nisung 3,082, Punjab nung 2,870, Madhya Pradesh nung 2,276, Gujarat nung 2,270, Kerala nung 2,216, Tamil Nadu nung 2,194 aser Chhattisgarh nung 2,153 dak putet, ta Health ministry-isa ashi.

Tesüiba ghonda 24 tsüingda COVID-19 puteta alir nisung 291 asü aser parnok züingsema tasür ajak agi 1,61,843 kümogo. Tang India nung COVID-19 puteta alir nisung 5,21,808 anepaludar aser nisung 1,13,55,993 taneptsü nguogo, ta Ministry-isa metetdaksü.

Maharashtra nung nisung onsara dak Covid-19 aliba puteter aser iba jagi taruba hopta nungi lockdown asütsü akok, ta tanü ketdangsürtemi ashi.

Maharashtra Chief Minister

Uddhav Thackeray-i Health Minister Rajesh Tope, Health Secretary Dr Pradeep Vyas aser Covid Task den senden ka amendang lockdown asüba onük benoka jembi.

Tesüiba anogo asem tsüingda, Maharashtra nung nisung 1.13 den timba dak COVID-19 aliba putetogo. Deobarnü nisung 40,414 dak puteta liasü.

Union Health Secretary Rajesh Bhushan-ia state health secretary tem, municipal commissioner tem, aser district 46 (COVID-19 kanga putetba district tem) nungi district collector tem den senden ka menogo.

Covid-19 agi asür nisung 90% ji arishi küm 45 ser temapurtem lir ta senden nung Centre-i osang metetdaksü.

Senden nungsa Centre-i district 46 nung anogo 14 bosa containment aser contact tracing mapa inyaksü tetuyuba agütsüogo.

Punjab aser Maharashtra nung COVID-19 agi nisung aika asüba atema senden nungsa benoka lemsatep, ta osang ajanga ashi.

COVID-19 Nagaland: Nisung 3 dak putet

Kohima, March 29 (TYO): Hombarnü Nagaland nung nisung asem dak COVID-19 aliba putetba züingsema nisung ajak agi 12,233 kümogo.

"Tanü Kohima nung nisung asem dak COVID-19 putet" ta Health & Family Welfare Minister, S Pangnyu Phom-i metetdaksü.

Nisung 12,233 rongnungi 11,980 taneptsü nguogo aser Nagaland nung COVID-19 nungi taneptsü angubaji 97.93% li. Tang nisung 8 anepaludar ta paisa ashi.

"Nagaland nung COVID-19 puteter nisung 91 süogo saka

tasürtem rongnung nisung 10 bo tanga timtem ajanga asü. Nisung 154 tashi tanga state temi ogo," ta Health & Family Welfare Director, Dr Denis Hangsing-ia metetdaksü.

Tang anepalurtemji Dimapur nung nisung 5 aser Kohima nung 3 lir, ta paisa ashi.

"Nagaland nung COVID-19 alitsü akok ta temolung melemi bilemba sample 1,35,981 tendangogo. RT-PCR ajanga sample 75,353, TrueNat ajanga 37,514 aser Rapid Antigen Test ajanga 23,114 tendang" ta Dr Hangsing-isa ashi.

US-i Myanmar den shishilembaba ajak anener

Washington, March 29 (Agencies): United States-i Myanmar den shishilembaba inyakyim ajak anener ta Hombarnü US Trade Representative Katherine Tai-i metetdaksüogo.

Myanmar nung democratic sorkar ka meküimet tashi 2013 Trade and Investment Framework Agreement kübok shishilembaba ajak anener, ta Katherine Tai-i ashi.

"2013 Trade and Investment Framework Agreement kübok USTR (United States Trade Representative)-i Burma den US shishilembaba ajak anena atar. Burma nungeri democracy inyakyim ajanga sorkar kümtetsü merangba nung onokia pusema nungiter, kechiyong iba ya Burma rongsenkettsüing ainba aser melenshiba tamendakdak liasü" ta Tai-i Twitter nung metetdaksü.

"Burmese security force temi civilian tem anema tashiyim mapa inyakba khukhua aitsür. Timi lungkak aiterem, kaketshirtem, mapa inyakerem, lennirtem, medical nisungtem aser tanurtem tepsetba ajanga alima aoksadaksüogo" ta Tai-isa ashi.

"Item inyakyim ya Burma nung

democracy inyakyim agi melenba anema inyakba lir. Mitkartemi tashiyim mapa inyakba ya Burma nungeri yimjung aser azükaru aliba tarutsü yangerba anema inyakba lir" ta laisa shisem.

Myanmar nung armed forces aser security services-i azütokshiba ya Australia, Canada, Germany, Greece, Italy, Japan, Denmark, Netherlands, New Zealand, Republic of Korea, United Kingdom, aser United States of America nung Chief of Defense temi aitsüogo.

"Chiefs of Defense ama onoki Myanmar Armed Forces aser security services-i tai maketba nisungtem dak tashiyim mapa inyakba aitsür" ta Joint Chiefs of Staff-i Deobarnü külem sangdong ka nung metetdaksüogo.

Myanmar nung mitkartemi lungkak aiterem azüoktsü atema tashiyim mapa inyaka arudang nisung 459 shi tepsetogo.

February 1, 2021 nü Myanmar mitkartemi civilian sorkar atsüingdok aser linük nung küm ka 'emergency' alitsü osang sangoktsü.

Mitkartemi State Counsellor Aung San Suu Kyi dena civilian lennirtem aika pua lir.

Noksen by-election atema H. Chuba Chang nem NDPP ticket agütsü



Hombarnü Nationalist Democratic Progressive Party (NDPP) office, Chumukedima nung H. Chuba Chang nem NDPP ticket agütsüdag agiba noksa ka angur. (Dimapur, March 29)

Dimapur, March 29 (TYO): Hombarnü Nationalist Democratic Progressive Party (NDPP)-i 51- Noksen Assembly Constituency by-election atema party ticket agütsüogo.

Tuensang district kübok Noksen Assembly Constituency nung April 17, 2021 nü by-election agitsü aser Nagaland Legislative Assembly (NLA) nung pezüben tashi MLA inyaker H. Chuba Chang nem tanü ticket agütsüogo.

NDPP office, Chumukedima nung ticket agütsüba sentong agi aser H. Chuba Chang ya People's Democratic Alliance (PDA) indang külem candidate asütsü.

Yaküm October 12 nü Environment, Forest & Climate Change and Justice & Law Minister, C. M. Chang ajungbena asüba ajanga 51-Noksen menden tazüing aküm.

H. Chuba Chang-i tanü o jembidang PDA teloktep dang pelaba metetdaksü.

PDA-i pa dak temolung alemba aser maongka agütsüba

atema pelar, ta pai ashi.

Ni akokba tashi yariteptsü. Ni lennir tajung ka masütsü akok saka party aser Noksen Assembly Constituency-i aginüba ama ni tanidaker tajung ka asütsü" ta Chuba Chang-i metetdaksü.

Iba sentong nung BJP Nagaland president aser Higher & Technical Education & Tribal Affairs, Minister aser Co-chairman, PDA, Temjen Imna Along-ia Chuba Chang nem tenüingsang agütsü.

51 Noksen A/C by-election nung Chuba Chang-i NDPP party ticket amer PDA teloktep tenüing tokteptsü maongka agütsüba tenüingsang agütsür, ta Imna Along-i ashi.

"Central lennirtem temoatsüma nung BJP-i PDA teloktep tangatetba nung noktaka lir. PDA teloktepi takok angutsüba dak alaka BJP-i tanga tebilemba kecha mali" ta paisa metetdaksü.

NDPP president aser PDA Chairman, Chingwang Konyak-ia PDA teloktep nung adener ajak dang PDA candidate nem takok

ngudaktsütsü mepishia metetdaksü.

"Onoki shimba nübo ya NDDP atema dang masü saka PDA sorkar atema nübo ka lir" ta pai ashi.

Sentong nung Chief minister, Neiphiu Rio-ia H Chuba Chang nem tenüingsang agütsü.

"PDA teloktep longjema lir aser tarutsü anogotem külemi inyaksü aser by-election nunga takok tulu angutsü" ta CM Rio-i metetdaksü.

"Noksen bye election nung Congress-i metokteptsü telemetba agiogo anungji onoki NPF danga metokteptsü atema mepishitsü. Iba ajanga NDPP party den tetokteper melii talok angutsü aser longjemba den PDA aser state sorkar tali longjemshitsü" ta paisa ashi.

"Iba by-election nung NDPP- BJP teloktep ajanga constituency nung dang masü saka state nung telongjem bener arutsü. Iba ajanga Naga nunger yimten tebilemtsü latettsü atema akangshitsü" ta Rio-isa shisem.

Lower PWD Colony nung mapa aika inyakogogo

Kohima, March 29 (TYO): Hombarnü Kohima District Planning and Development Board nung 2019-20 atema 9 buba Kohima Town A/C Ward Adoption sentong agiogo.

Iba sentong ya Lower PWD Colony Ward-11 atema agi aser iba nüngtem nung Urban Development & Municipal Affairs Advisor, Dr. Neikiesalie Nicky Kire-i waiting shed ka lapoktsü.

Lower PWD Ward Adoption Committee-i iba waiting shed ya Lotha Baptist Church anasa yanglu.

"DPDB ajanga terenlok atema adoption asüba ya Kohima nung dang tenzük. Iba ya tashimaitiba yimtsüngtem asoshi tenzük aser lia arudang tashimaitiba ward tem nunga terenlok mapa inyaker" ta Dr. Nicky Kire-i o jembidang ashi.

"Nübertem asoshi inyaker ka asüyonga nisung ajaki aginüba ama inyaksüabaji tasak lir.

Inyakba mapa ajak kija atema masü saka lokti aser nübertem asoshi asütsüla. Asenok longjemra aika inyakettsü" ta paisa ayongzük.

Advisor Dr Kire-isa Lower PWD colony nungi Midland sendaktepba lenmang yanglutsü ta nangzük.

Iba sentong nung SDO (C) Sadar, Kohima & Convenor Ward Adoption Committee Daniel Angami, Lower PWD Panchayat Chairman Hayio Ngullie, PWD Panchayat Ward Chairman Dozhohü Tunyi aser Association of Kohima Municipal Ward Panchayat president Neibulie Kiewhuo nungertemia o jembidang Dr Kire nem tenüingsang agütsü.

Sentong nung mendenji SDO Soil & Water Conservation Renthunglo Tungoe liasü, Kohima Lotha Baptist Church Pastor Rev Dr K Benri-i temoatsü meshia sarasadem, Lower PWD

Advisor Meyi Sanglir-i tesentepertem pelaa agizük aser Lower PWD Youth Organization president Kevimese Mere-i anküp tepela o jembi.

Lower PWD colony nung 2019-2020 tsüingda Ward Adoption Program nung mapa inyakbatem:

Waiting shed, Toilet, Youth Recreational Hall, footstep yanglu, Lotha Baptist Church Kohima nungi Chandmari HSS tashi Black topping, Lower PWD Taxi junction nungi Midland Bridge tashi Black topping, transformer 250 kilowatts enok, solar light 7 enok, safety convex mirror 3 enok aser electrical post tasen melen.

Maneni, iba sentong kübok tetsürtem atema paper bag making, tourism department ajanga hospitality & management training aser Land Resource Department ajanga vermicompost training agütsüogo.

45 buba AKTD lokti mungdang takok ngua agiogo



Ao Kaketshir Telongjem Dimapur (AKTD) 45 buba Lokti mungdang aser 14 buba Excellency Award sentong March 29, 2021 nü Sakus Mission College, Auditorium, Dimapur nung alidang 2019 aser 2020 küm AKTD züngsem HSLC aser HSSLC tatidang nung temaba (top) jenjang angurtem den AKTD mendenpurtem, ASTD, WTD aser DALT nungi lenirtem külemi tangokba noksa ka yangi angur.

Dimapur, Metsüremi/March 29 (TYO): Ao Kaketshir Telongjem Dimapur (AKTD) 45 buba Lokti mungdang aser 14 buba Excellency Award sentong March 29, 2021 nü Sakus Mission College, Auditorium, Dimapur nung "Terajem takum" omen nung ajemdaker agia liasü.

Taoba AKTD sanen luden züngsem aser mungdang nung o jembir, Kathyinla Jamir EAC (P) ajanga kaketshirtem dang tensa den peta pei tejangraba inyaksü ayongzük.

Lai kaketshirtem dang azümesena malitsü aser ajemalua Tsüngrem tsübu pei nükjidadong tongtettsü asoshi

nendaka agüja inyaksü ajungshia liasü.

Laisa kaketshirtem dang pei ayak aser tera mamadoki alitsü ayongzüka liasü.

Iba sentong nung Dimapur nung aliba AKTD züngsem rongnungi 2019 aser 2020 küm HSLC aser HSSLC tatidang nung tematiba jenjang nung takok angur parnok nisung ti (8) nem tetushi agüja liasü.

Limaakum, Pastor DABA ajanga sentong nung Tsüngrem temoatsü jazüka sarasadem, AKTD tir, Moayanger Jamir ajanga menden okila o jembir, Ao Senso Telongjem Dimapur nung tongti zülur, P. Sashi Longchar ajanga tayongzükba o jembir, Er.

Menang Molier (Retd.) AKTD Senyur ajanga tepela o jembir aser Imnanaro Jamir ajanga temeja ken ka tena liasü.

Maneni Watsü Telongjem Dimapur tir, Yarsangla ajanga sentong tempanga sarasadem. Iba sentong nung Kipangwala Jamir sentong lenir liasü.

2021-2022 Ao Kaketshir Telongjem Dimapur len anitsü asoshi ketdangpurtem yamai shima liasü: Tir Temsukaba Aier (Mopungchuket), tatong tir Imnatemsu Ponger (Mangmetong), tongti zülur Lanuwapang Jamir (Asangma), repsem zülur Aosanen Aier (Dibuia) aser senyur Khensaneken (Chuchuyimlang)

Security Forces temi Dimapur nung nisung kar apu



Dimapur, Metsüremi/March 29 (TYO): Security Forces temi March 28, 2021 nü Police den lungjemer Dimapur district kübok general area Mishikito nung operation ka agiba mapang NSCN (IM) züngsem ka pua liasü.

Osang tejangja angazükba nung ajemdaker sepaitemi operation agiba mapang NSCN (IM) züngsem ka ket nungi 9mm pistol ka, injang 12 aser 12 Bore indang injang asem nguteta liasü.

Iba maparen dak sendakba nung maneni asüngdangyatsü atema pua alisang den pa ket nungi ngutetba oset ya East Police Station Dimapur nem agütsüogo, ta sangdong ka

ajanga ashi.

Dimapur district kübok general area Iron Bridge Zutovi Junction nung March 25, 2021 nü Security Forces aser Police lungjemer operation ka agiba mapang over ground worker (OGW) ka pua liasü.

Osang tejangja aruba nung ajemdaker Security Forces aser State Police lungjemer operation agiba mapang OGW ka ya apu aser pa ket nungi point 32mm Bore Pistol ka, point 32mm Bore Pistol indang magazine ana aser injang 13 nguteta liasü.

Pua alisang den pa ket nungi ngutetba hadir ya maneni asüngdangyatsü atema Chumukedima Police Station,

Dimapur nem agütsüogo, ta sangdong ajanga ashi.

Maneni March 28, 2021 nü general area Kuhoboto, Dimapur nung Security Forces aser Police lungjemer operation ka agiba mapang NSCN (KN) züngsem ka pua liasü.

Iba mapang pa ket nungi point 22mm Pistol ka den magazine, point 22mm Pistol indang injang ti, AK-47 indang injang 25, 9mm injang pongu, Grenade number 90 ka aser tai aputsüla oset kar nguteta liasü.

Pua alisang den pa ket nungi ngutetba osettem ya asüngdangyatsü asoshi Diphupar Police Station, Dimapur nem agütsüogo, ta kasa sangdong ajangasa ashi.



Impur nung Artang Baptist Arogo rest house cum ABAM staff quarter ka March 29, 2021 nü Rev. Dr. Mar Atsongchanger Executive Secretary, ABAM ajanga meshiteta lapoktsüogo. ABAM-i duplex ki yanglutsü lemteter arogotemi ABAM staff asoshi quarter aser pei Arogo asoshi rest house yanglua aruba tan agi ki pongu buba renemba alitsü. Iba ki yangluba nung ajak agi sen lakh 66 dak tema intok. Arogoi rongsen jenti entoka Impur nung Mungdang asoshi mapa tajung inyakba atema Artang Baptist Arogo dang pelar, ta Rev. Dr. Mar Atsongchanger, Executive Secretary, ABAM ajanga sangdong ka nung ashi.

AKM-i March 22 lendong aitsür

Dimapur, Metsüremi/March 29 (TYO): Peren district kübok Lamhainamdi yimtsüng nung March 22, 2021 nü tai maket civilian asem tepsetba atema Ao Kaketshir Mungdang (AKM) aoksar aser asükhü lemsateper, ta AKM tir Nungdokyangar Ao aser tongti zülur Nekmi Longkumer nati sangdong ka ajanga ashi. Onoki iba tatalokba ya tematiba jenjang nung aitsür, koba tejakleni aoba loktiliba indang inyakyim ajunga anema lir.

Adianu ama kati ka den yimjung nung angatettepa aliba nung 'bendanger yimsü' agi kongshiba ya kanga tejashitsü mapa ka lir aser asenok tsüngta tesempatem adokdaksür, ta sangdong nung shia lir.

Iba ama inyakyim ya lokti ajungai aitsütsüla aser ozüng amshir dang taochi melie mapa tamajung inyakba atema tapet temerenshi agütsütsü ajungshir. Kasa mapang AKM-i asür kinungertem den asükhü lemsateper, ta ashi.

ANCSU 'Seniors' Conclave' agiogo



Dimapur, Metsüremi/March 29 (TYO): All Nagaland College Students' Union (ANCSU) pur indang "Seniors' Conclave" sentong March 29, 2021 nü Tourist Lodge, Dimapur nung agiogo.

Iba sentong nung taoba ANCSU tir Deon Swu menden liasü aser Tribunal züngsem Kewetso Kenye-i senden

tenzüka sarasadem.

ANCSU tir Vimeyiekho Vitso-i senden nung adener pela agizükba o jembia liasü aser taoba mapang ANCSU tir inyaka alir, Akangtemjen Longkumer aser T.S Lotha nati tajungshi o jembia liasü. Maneni iba mensem nung Arenchenla Walling ajanga temeja ken ka aten,

Tashiyim mapa inyaker nem tapet temerenshi agüjang: ENWOD

Dimapur, Metsüremi/March 29 (TYO): Nagaland ya Khristan state ka asünung, kati ka dang meima akumtsüpuba tsütsü dang state tem tatishitsü tajung aliba state ka asütsüla. Saka tanü asen lokti nung tensa ya asadangra, asenok ya shirong sürnung san kep meyrir ali ama sayur, ta Eastern Nagaland Women Organization Dimapur ajanga sangdong ka nung ashi.

Tening, Peren nungi tang Half Nagarjan, Dimapur nung telidak, arishi küm 55 tain Kikua Marian-i March 20, 2020 nü tanur ka dak tashiyim agi shi nung medemba asoshi Eastern Nagaland nung aliba nüburtem temolung kanga yirur aser jashir. Iba ama inyakyim yagi tashi/temaba jenjang nung alirtemi tetsübu mesüra apayua melie rongsenketsüng tsütsü tashi maitba jenjang nung alirtem ajemoktsütsü merangba sayur, ta parnok ashi.

Iba ama maksü tatalokba ya ozü Eastern Nagaland züngsem dak tang mezüng ataloker masü saka onok social aser economic tsütsü tesülen atsüngzükba aliba mechi aiben ajangshia aruogo. Eastern Nagaland tezülen makamait tia aliba ajanga sensakpo tsüraburtemi pei tanur arishi küm 5-6 tashia teyariteper ka ama inyaksü aser kasa mapang school zünga jenjang ajungkettsü asoshi jila leni takaiter kidangi yoker. Ajisüaka onok tarutsü asoshi yongyaseta ataba teimlatem aiben item tanurtem aser tsüraburtem asoshi nisung molungsentsü agi magizükteti kümadoker, ta

sangdong ajanga ashi.

Onoki mapang kobika tashi item amala timtem ya yimya ka ama agizütsü? Nisung takum jenjang angatetsü asoshi onoki nisung takum kwika tenlatsü? Asenoki mapang kobika ola madoki alitsü? Item melangzütetba tasüngtangbatem ya Eastern Nagaland nüburtem atema kisüng masü saka Naga nunger ajunga aser talisa mapa tamajung inyaker nem menua melie temerenshi agütsütsü makokba ketdangsürtem asoshi lir, ta ashi.

Asen Naga society nung tatok agüja aser angatetepa yimjung nung külemi alitsü tangatetba aliba ajanga mapa tamajung inyaker asoshi temolung nung sasaba melie inyaksangshitsü asoshi lenman sadema lapoktsür aser ajungmesor.

Nagaland nung obendang bangdak sensamasa amshiba asoshi tatishitsü sayua iba ama mapa tamajung inyaker nem atsü-anem melie tapet obendang agütsütsüla. Aser iba ama tatalokba ya Eastern Nagaland kisüng nung masü sana Naga nunger ajak asoshi lir, kechiaser asenoki kodang iba ama mapa inyakerter sadok-sayima jajadaksüdir ner jala mesüra jabaso tem daka ataloktsü akok, ta sangdong ajanga ashi.

Eastern Nagaland Women Organization Dimapur ajanga iba tesempatsü tatalokba ya aitsür aser ketdangsürtem dang tekeratiba nung aibelener nem tapet temerenshi agütsütsü mepishir, ta parnokisa ashi.

Congress-i menden 37 nung takok angutsü: Gourav Vallabh



Hombarnü Rajiv Bhavan, Guwahati nung Assam Pradesh Congress Committee ajanga ayongba press conference agidang tangokba noksa ka angur. (Guwahati, March 29)

Guwahati, March 29, 2021

(Agencies): Assam Assembly election 2021 indang mezüing shilem nung Congress teloki menden 37 angutsü ta Hombarnü All India Congress Committee (AICC) otongdar Gourav Ballabh-i ashi.

Rajiv Bhavan, Guwahati nung Assam Pradesh Congress Committee (APCC) indang headquarters nung osangbener den jembiba (press conference) mapang party lenir Gourav Ballabh-i Assam election mezüing phase nung Congress-i menden 37 nung takok angutsü indang kuli süa liasü.

Assam Assembly election indang mezüing phase nung Assembly seat 47 atema March 27, 2021 - Honibarnü poll agiogo.

Assembly election indang tanabuba aser tasembuba shilem ya April 1, 2021 aser April 6, 2021 nü agitsü.

Gourav Ballabh-i ashiba o nung atongsema Assam Pradesh Congress Committee (APCC) president, Ripun Bora-i, Assam Assembly election indang mezüing phase nung Congress-i seat 30 dak tema angutsü, ta osangbener dang metetdaksü.

Rajiv Bhawan nung Assam

Congress president Bora-i osangbener den jembiba mapang, Assembly election indang mezüing phase nung nübur aikati vote agütsüba atema pai Assam nüburtem dang pelaba metetdaksü.

Assam nung osangkaket 7 indang Deobarnü adok nung BJP-i iba election mezüing phase nung seat timba takok angutsü ta kuli süa advertisement agütsüba dak sendakba nung, Ripun Bora-i, "Koba tensa/yimya ka nung advertisement adok ajanga seat timba takok angutsü ta BJP-i shiteter?," ta asüingdanga liasü.

Assam Assembly election mezüing phase indang polling temer sülen, anogo ka lir osangkaket nung iba advertisement adoktsüba nung ajemdaker Congress-i Election Commission of India aser Assam indang Chief Electoral Officer (CEO) dangi memorandum agütsüogo.

Representation of People Act, 1951 indang Section 126A temzüing nung aibelenba atema tapet temerenshi agütsütsü aser Election Commission tetuyuba nung ajemdaker Deobarnü APCC indang legal department chairman-i party' national

president JP Nadda, state president Ranjeet Kumar Dass aser Assam chief minister Sarbananda Soonowal densema BJP lennirtem anema FIR ka benokogo.

Iba poll nung vote agütsür tem dang pelaba metetdaksüidang, Assam Congress president Ripun Bora-i, "Assam nung alirtemi pei franchise amshia vote agütsüba atema pelar; voter shilem 80% agi mezüing shilem nung vote agütsüogo" ta ashi.

"Iba Election indang mezüing phase nung tamakok angutsü tetsübu nung aser parnok maparen tamakok anguba meimangsü mechi, BJP-i iba amala advertisement teyari agütsüsa akümer," ta Assam Congress president-i ashi.

Assam nung alir nüburtem dang pelaba metetdakja aser teimla agüja jembiba mapang, Congress otongdar Gourav Vallabh-i, "Tang nungi shir, BJP pur indang tiyazü advertisement aser parnoki tasa balala amshia mesüzükba o tanang tsütsü Assam nüburtem manidaksü/ mepuatettsü. Tenangzükba pungo yur, Assam nung Congress-i Sorkar tentettsü," ta ashi.

Parbatjhora police-i nübur dang vote agütsütsü ajungshi

Kokrajhar, March 29, 2021

(Agencies): Assam indang Kokrajhar district kübok Parbatjhora sub-division nung alirtem dang Assam Assembly elections nung vote agütsütsü asoshi Parbatjhora police-i ajungshia liasü.

April 6, 2021 nü Assam Assembly elections indang shilem tasembuba agiba mapang Kokrajhar tesem nung poll agitsü.

Deobarnü iba sub-division kübok Mahamaya tesem nung 'To Vote and to Vote Without Fear' omen nung ajemdaker Star English School

kaketshirtem, NGOs, Mukti aser Muhurto tem den Parbatjhora police longjemer sensitization sentong ka ayonga agiogo.

Police nungi teshimtet nübu, kaketshirtem aser NGOs züngsemtemi nübur den sensaksema aser tan Assam Assembly elections nung ajaki shilem agia pei indang franchise shitak amshitsü asoshi mepishia liasü.

Iba sentong agiba mapang, parnoki nübur nem handbill lema agütsü.

Sensitization sentong nung shilem agirtemi Golden Langur

indang mask inoker nübur den sensaksemogo.

Parbatjhora sub-divisional police officer Trinayan Bhuyan-i ashiba agi, "Alima nung Golden Langur aliba tesem tulutiba ji Kokrajhar nung Chakrashika Wildlife Sanctuary ya lir ta nübur dang sayutsü aser iba osang nüburtem dang metetta lidaktsütsü nükjidong nung onoki Golden Langur indang mask inoker shilem agi,"

Alima ajunga nung shiruru tapu balala rongnung Golden Langur ya sama aotsüsa lendongbang nung aliba shiruru ka ama züngshir.



Deobarnü Mahamaya tesem nung sensitization sentong ka ayonga agiba mapang, police, kaketshirtem aser NGOs züngsemtemi nübur den sensaksemba angur. (Kokrajhar, March 29)



Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA

E-mail: abamimpur7@yahoo.co.in

Website: www.abamimpur.org

Date: 03.03.2021

ABAM-I REV. DR. MAR ATSONGCHANGER NEM TENÜNGSANG AGÜTSÜR

ABAM ajanga Rev. Dr. Mar Atsongchanger Executive Secretary, ABAM Vice-Master of Serampore College shimba asoshi pa nem tenüngsang tulu agütsür. Aküm tulu aketba mapa nung tongti shilem agitsüsa Council of Serampore College-i mulung lemtetba asoshi parnok dang kanga pelar aser Tsüngrem tenüing asanger. Lenir taküm-i iba wadang tulu nung tongti shilem agidang temaba nungi takok agüjang ta ABAM tamang sarasadem ayur.

Sd/-

Dr. Lolen Imchen
President, ABAM.

AO MUSICAL REVIVAL TAYONGER LANGPANG NUNGI

- *Talitemjen Imchen*

March 18, 2021 lutet 9 puba nung "Ken Copyright Nung Aibelenba Ajanga Tatok Meshir" ta ser Bendang, Dimapur ta address agütsür alibaji, tetsür asü teburar osang kaket züluba yimya nungjibo mejangjar. Ao Musical Revival Volume (AMR) ii ken Copyright nung aibelenba atema taidok meshidang, ano AMR ii nung tongtipang süa kentener Bendang Imchen-i anir Dimapur nung Bendang tenüing alir tetsür tebur ajak tenüing menüksüogo. Taidok meshiba sülen osang kaket azüngertem rongnung nangnung adokbaji, nai angashir alitsü. AMR-i na ajungshitsü kecha mali, "Süjen Anar Koya Apu Ama" taidok nangzükba anüko nunga pei tenüing jangjaa mezüluteti, ajemalu mesütetba atema sasaa bilemstsür.

Aor asoshi kongkikeno (music) tsütsü tasü kümogo. Kentenerterem-i Ao ken meyanglubaji Ao kin-i metettsüla. Asüing lanurtem asoshi kongkikeno wazüktsütsü, tanü asen putu tasüaküm (survival) ka inyaksü nüngdaka lir. Kongkikeno nung mongin kati AMR ya ayong nungbo, item jagi kongkikeno lenmang meteta lirji, anasü mesüra asemüsü dang anibelem süla. Ni lyrics tera zülutetba dak alaka, ken atentsü mashi, kongki awatsü aser atemtsü mashi aser kensü meinokteter. Iba jagi Ao Musical Revival atema kentenerterem jatepa ken tasentem yanglur alima dang sayutsü aser angadaktsütsü ni asoshiho mapa temela masü. Tebelemji ni dang metet aser külemi inyakeri dang metet.

Kiyong nung car ka samara, kiyongertembo kümdangshir aser kipur car samaba takoksaji dang ajurur. Saka anarongtena küm ishika nung ken kar yanglur adokba mapang, software kar ajanga raksar aser copier yutsürapang, iba jagibo jakzük (generation) tashi tepseter. Itemji lanurtem-i angudang, kenten sempet akütertem-i pei tejangraba melenshiadoker aser kongkikeno tsütsü samaa aor. Anungji asüing asoshi meima bilemer, Aor senso tajung ajaki ken raksatsüba, copytepa neputem ngurapang aputsüla aser obendang dak keno agütsütsüla. Kari tasümaiti Tsüngrem-i merenshitsuär ta ser doktsüidang, Ao kin kongkikeno tsütsü asür ta metetdang. Software oset amshia yangluba nung mimshitsü makoker, yamaji software ajanga aoyaba nung atsükshishitsü aser jenputsü lenmang mali. Nai kipur masüba indang pei meyong küma amshia lira, aji kodang obendangdaki arutir, naji mejenbotsü. Tsüngrem tsüngdanga item ji temenen asütsü. Copyright temzüing ya asenok asoshiho kanga tejen kabo masü. Asenok ajak Bendang Dimapur dak ya tansütsü agiti aser kari danga copyright keno mangateti lira, iba oset ajanga asenok ajak tangateter kümer, Aor kongkikeno wazükba nung shilem tajung agitsü merangtepti.

Onoki Ao Musical Revival Volume (AMR) ii pendrive nung yanglua lir. Pendrive (music card) sen tasak agi alir asünung, kensep ana indang ken terana (12) pendrive ka nung inoker ayoker. Koikati Ao kin kongkikeno kümzüktsü mechi aser Ao ken meima alir car nung, television nung aser monile phone nung repranga angateper. Item tangateter senso tajungtemji ngua lanurtem pei sempet nung Ao kin asoshi tali tsüradakjangma. Tsüngrem-i Ao kin moajangma.

Pei sobaliba tera mamatsüla: MLA Nyamar

Siang, March 29, 2021

(Agencies): Tamangba yimsü koba nung anidaktsü mulung yonga, pei sobaliba tera kodanga mamadoktsüla, ta Deobarnü Liromoba MLA aser advisor to home minister Nyamar Karbak-i Arunachal Pradesh lanurtem ayongzük.

"Pei shimba/jangraba tamangba yimsü ka nung anidaktsü ya teshimer mulung lir; ajisüaka asenok kin sobaliba kümzüka ayutsü aser iba nung anidaktsü ya tongtibangtem ka ama ajaki angatettsüla. Nisung kati sobaliba, pei lipok otsü aser yimsü yimli memetetbaji tera maliba süngdong ka mesük," ta Karbak-i ashi.

Deobarnü, Anüolen Siang district kübok Yaki Tato Keak yimtsüing nung United Christian Forum indang

youth wing foundation day sentong nung Arunachal Pradesh MLA-i jembialiasü.

Karbak-i ashiba agi, "State aser linük tarutsü atema lanurtem dak teimla lir, ajiasünung akhi tetsü tebou temi sayuteta yutsüba sobaliba tajung tejakleni bener aotsü asoshi lanurtem dak tuluka keta lir."

Temesepta mozü achi ajemba densema lokti nung teraksa adokdaksüba maparen nungi pilar alitsü aser item anema ang nokdaksü asoshi, MLA-isa lanurtem ayongzük.

Career ka ama saisapong aser asayatem nung shilem agitsü aser nüngtugu saisaponger ka ka akümtsü asoshi Arunachal Pradesh sorkar indang reservation policy maongka agitsü asoshi pai lanurtem ajungshia liasü.



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 30, 2021

MYANMAR ATEMA NAGA NUNGERIA KECHI ASHIR?

- P Tiamongba Aier

February 1, 2021 nü Myanmar nung mitkartemi sorkar atsüngdoker yimsü asütsü tenzükba sülen nungi linük nung tensa kanga mejungi kümer liyonga arudar. Mitkartemi osangkakettem aser social media nung osang prokshiba noktanger saka angashiba agi sorkar atsüngdokba sülen mitkartemi tashiyim mapa kanga inyaker aser nübortem reshikangshir. Democracy-i melaba ama sorkar kümteta aliba tashiyim agi atsüngdoker yimsü asüba ya Myanmar nung aikati magizüker aser parnoki tesem balala nung lungkak aityonga arudang tai maketba taküm aika laluogo. Myanmar linük ya Bangladesh, India, China, Laos aser Thailand linüktem meketbanga lir aser nisung aikati timtem maremba ajanga linük toktsür anameta aliba linüktem nung jenoker. Talisa Myanmar nung aikati India nung arua jenoker aser jenoktsü meranger kechiyong India aser Myanmar tsünga kilometer 1,468 shi kati arrtsütepa lir aser alimang tuluba ka Northeast nung lir. Asenoki osang balala ajanga Mizoram aser Manipur nung Myanmar nung arua jenokba angashiogo saka Nagaland nung arua jenokba osangbo kecha mangashir. Tanga state ana nung arua jenoker süra Nagaland nunga arua jenokya alitsü südi saka state sorkari mesüra Myanmar den arrtsütepa aliba district ketdangsürtemi iba atema tebilemtsü kecha mabener ama bilemer. Külen, Naga Hoho-i anir Naga nung lokti tentettemia osangkaket nung Myanmar mitkartemi inyakba mapa aitsüba aser ano telok kari shimo milen tsükloker Myanmar nung pusemer ta sayuba dak alaka temolung magütsür ama bilemer. Hao, India sorkari Myanmar den arrtsüa aliba state tem- Mizoram, Nagaland, Manipur aser Arunachal Pradesh nem tetuyuba agütsüogo, saka Mizoram-ibo Myanmar nung yaritsü ta metetdaksüogo. Mizoram Chief Minister Zoramthanga-i National League for Democracy nungi Myanmar Foreign Minister-in-exile Zin Mar Aung den-a video conference ajanga khuret metetpelaogo aser par state nung arua jenokertem yaritsü nangzükogo. Kechiba Mizoram nungeri Myanmar nung yaritsü molungteter ta süra, parnok alemli nungi sendaktepa lir ta ashir. Süra, Nagaland sorkaria kechi ashir? Naga nungeria kechi ashir? Asenoki Myanmar Naga nung indangbo jembir aser atangji parnokji asen külem Naga nungertem lir aser azü agi sosema lir. Anungji asen külem sensotem aliba linük aser tesem ka nung iba ama tensa tamajung ajurudang, Nagaland sorkar aser Naga nung loktitentettemia yariteptsü tim. Tang tashi nung osang balala angashiba ajanga atangji Myanmar nung nübortem kanga timtemdar aser mitkartemi tashiyim mapa inyakdang nisung taküm aika laluogo. Shibai metet tasürtem mesüra yiruyibongertem rongnung Myanmar Naga nungera densema alitsü nung koda! Anungji, Nagaland state sorkaria Mizoram sorkar ama telemtetba tajung agia mapa inyaksüla aser iba denji külemi Naga Hoho-i anir Naga nung loktitentettemia akokba tashi yariteptsüla. Küm aika mitkar yimsüsüba kübok timtema aruba sülen anarongtena democracy tangatetba nung sorkar kümteter nübortem temolung sadoka liyonga aruba mapang ka nung, ano tanaben mitkartemi tashiyim agi yimsüsüba yabo aitsütsüla aser tekaratiba nung democracy inyakyim bener arutsü atema rongshitsüla. Nagaland sorkari anir Mizoram, Manipur aser Arunachal Pradesh sorkartemi Centre dang Myanmar tensa azüoktsü atema tebang iang ta takhangba agütsütsüa koka lir nung koda. Naga nung saksalemshir Myanmar nung aser talisa idakji aliba asen külem Naga nung asoshi ola adoktsüba aser mapa inyaksüba mapangji tang ya lir.

OLEMSABANG

ABAM asü inyaker kar mangmangkorar?

~ S. T. Yapang Lkr. Kohima

Impur museum nung noksa ka ngua nibo kangsa süngmang, iba indang tangar nungi angazüka liasü, saka ni mamangteti 16 March 2021 nung Mokokchung len senzüdang asa Impur jaki khien lua reprangdang, noksa züluribo tebilemba tajung nung zülur alitsü, saka shitipak nung züluba o ya ngurbo ABAM nung inyaker kar mangmangkorar asü! Ta bilemer. Noksabo tejen, saka o zülur ayuba yabo tawa tanü mapa dang südi ta bilemer.

Noksa tsünglanglen ozülü yamai ka zülua lir. "A Potrait Depicting the first arrival of the Gospel to Dekahaimong (Molungkimong) village of the Naga Hills in 1872. Right to left: Godhula (Assamese Evangelist) Süpongmeren (First Ao Convert) Dr. E.W. Clark, Mrs. Mary Mead Clark and the Dekahaimong villagers."

Merangkong nung aikati kidang Longjanglepzük noksa ka nung "Longjanglepzük, the first Ao Naga Christian Convert from Merangkong village, Baptist at Sibsagar in 1851" ta zülur nguogo, süra ya Süpongmeren tama tzüsena lira Merangkong nung asoshi temelenshitsü ka lir ta reprangteter, aser ABAM-ia Merangkong nung dang aji kuli tejangja agi shitettsüla, kechiyong ABAM-i zülur yua lir, saka ya ABAM ajaki jembir ayuba masü shi agi tenzük nung ka, pa tebilemba balaka nung ayuba dang asütsü akok. ABAM amala ka tzüsenba kuli tejangja makara mamshii alitsü junger, ano tarutsü nung khui tejangja bushitetra idangji melenshitsü akok. Anungji ABAM-i kuli tejangja meteta lirbo kechiba pei nütsüng nem memetetdaksüi miimshia ayur? Kuli tejangja makara Nokinketer Mungchen koba ABAM ajanga rongsen aser nübu jenti lalua kuli bendener 1972 küm adok yangji zülua aliba ama Longjanglepzük-ji Ao Naga mezüngbuba tamanger/tzüsener asütsüla. "Süboongmeren shiba mapang talangka Godhula aser Dr. Clark den tesayur ama liasü, aser pa ajanga Naga limai Godhula aser Dr. Clark tutettsüsa leman aiki bushitet, pa tenüngbo item baptiba telok ana nungji ka nunga tensema mangur." (Nokinketer Mungchen tapak 40)

Süpongmeren shibai iba yimsü asen limai bener arutsüsa pa mapang, sempet aser shisa tajungtiba agi yaritepogo pa mapa tajung asenoki bilemtetdi aser tetushi agütsütsü tim, iba tensa asenokbo zülü makai aliba mapang, saka tangar zülü teperi liasüba mapang asünung zülua yutsüba tejangja ka mengutetera mamshii ata tajungba. Saka kari nguteta lira mesüra tesülana ngutetra miimshia meyui nübur ajak asoshi lemsateptsü mepishir.

Ano Impur nung aliba noksa aser ozülü den meputepbaji Nokinketer Mungchen tapak 37, 38 aser 39 tashi nung mezüngbuba DR. Clark Naga tenemi atudang tebuttsü medeni atuba otsü jaki angateter, saka tang noksa aser noksa nung neploktsüba ozülü jakibo mezüngyongi tebuttsü dena atuba ama zülur neplokja lir, asü mezüngyongi tebuttsü dena atuba kuli lir sürnung nütsüng nübur dang miimshia mesayui ayur?

Tekalen shia aliba kulitem ya reprangdang ABAM aser Tsüngrem nisung asen limai arur aoba otsü anema inyaker kari pelepsar asünungbo pa/la mapa nungi anentsütsü tim, yimjung aser tesünep nung anisüngzük/soti magütsütsüla.

Nagalima nung Arogo tenzükba aser mezüng tzüsenba indang jembidang asen Aor tashitemeteter kati kü dang yamai ashi "Asen Aor asatepdang tanga kin kati (kin tenüng meshili) ibai bener aotsü koka lirko" aji reprangdang nung kenübo yamaji ataloktsü shingaia meteta mali ta Nokinketer Mungchen tapak 17 nungi angateter. Ashiko tambu aginüadang mesüra kuli tera lirbo kuli tuluka küma yanglushir item kintem jaki ozü mezüng tzüsen, ozü mezüng arogo ta arura asenia kechi ashitsü! Saka ochi kuli dang sürbo shir tama südir aji ojang, asenia yangji anidakdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China tesem ajaklen ketdangsertemi House Churches shibangtsür



China nung police-i Bible Reformed Church-i arua Khristantem indang nija osang bendenba noksa nung angur.

March 29, 2021: Tawa China sorkar ketdangsertemi linük tesem ajaklen House Churches mita aor aser aika shibangtsüogo.

Tang tepuokdak alisang pastor Wang Yi indang lawyer aser Shanghai nung aliba Arogo ka nung lenir, Zhang Pei-Hong, tekülem sentong tagidak mapang nung pua police station-i anir ao.

Shanghai nung aliba Lancun House Church nung sayutsüngir, Zhang Pei-Hong aser sorkar ketdangser ka na külemi tangokba noksa ka lemsatop; aser iba noksaji tekülem sentong tagidak mapang tangokba noksa liasü;

tetezü tekülem tagidak mapang nung sorkar ketdangsertemi Khristantem nem timtem agütsü.

March 21 nü sorkar ketdangser jagi Zhang aser Arogo lenirtem dang asüngdangyatsü atema nenok ajak police station-i arung ta tuyua liasü. Iba dak alia tekülem sentong nung adenertem ajak dang pei nija osang tejangja agüjang ta tuyu. Ketdangser jagi Zhang dang ner Arogopurtem dang senshitsü tuyuang ta ashi, iba sülen ketdangsertemi Zhang anir police station-i ao, ajisiüaka tesülen chiokogo.

Zhang ya nüngtugu

Khristan lawyer ka lir aser pai China nung pastor aika atema ken o jembitsüdar; item pastor tem rongnung Early Rain Covenant Church (ERCC) Pastor Wang Yi, Zhejiang nung Three-Self Church Pastor Joseph Gu aser Guizhou Living Stone Church nungi pastor tem densema lir.

China Aid osang janga ashiba agi, kasa anogo nungsa (March 21) ketdangsertemi Chongqing Mt. Olive Church mita aoba sülen pastor puer ao. March 17 nüa Yunyan District Ethnic & Religious Affairs Bureau-i Ren'ai Reformed Church dang Tenla ki shibangang ta tuyua liasü.

Palm Sunday nü Indonesia nung Tenla ki amaker ana jangjaogo

March 29, 2021: Palm Sunday (March 28, 2021) nü Indonesia nung Roman Catholic Arogo Tenla ki ka kima bomb lendong agütsür nisung ana maitsü jangjaogo; tena ya tawa kibong küma liasü, ta Indonesia ketdangsertemi metetdaksü.

Tena ya kiralongrartem den tesendaktep lir ta melung melemi bilemer.

Pressure cooker agi yangluba bomb pokdaksüba lendong nung Sacred Heart of Jesus Cathedral Arogo Tenla kima security guard pezü densema nisung 20 yirua liasü. South Sulawesi province yimtiba, Makassar nung bomb pokdaksüba ajanga Tenla ki kichiba aina aser anasa aliba ki kar raksatsü.

Bomb lendong agütsür apuanii ita trok tejaklen kibong küma liasü aser police-i maneni iba tatalokba bushisüngdangdar, ta National Police otongdar, Argo Yuwono-i metetdaksü.

"Iba ken o nung aibelener tangartema aputsü atema maneni bushisüngdangdar. Police-i tena maitsü jangjaogo aser kiyongertemi tenaji Lukman aser Dewi na lir ta metetdaksüogo. Tenaprong arrshi küm 23 nungi 26 tsüingda liasü," ta Argo-isa metetdaksü.

Alima tesem ajungalen

Khristantemi Palm Sunday amongba mapang nung Tenla kima bomb lendong atalokba mapang nungji tekülem sentong mezüngbuba shilem nung adenertem Tenla kidang nungi ayazüka alua liasü aser tanabuba shilem nung adentsüpurtem Tenla kidangi toudak liasü.

"Motorcycle nung nisung ana arur Tenla ki telungi aitsü merang saka security sepaitemi temelung melemtetba agi tena nokdang; iba mapang nungji tena rongnung kati temang nung alenloka aliba bomb pokdaksü aser idangyongjisa asü. Nisung aika südaksütsü nükjidongnung pressure cooker bomb nungji tapoktsü oset aser kojala aika inoka liasü," ta Makassar city police tongti, Witnu Urip Laksana-i metetdaksü.

Police-i bomb pokdaksür ana maitsü jangjatsü atema par kinüngertem indang DNA tests agiogo, ta Laksana-i ashi.

Apuani naji Jemaah Anshorut Daulah telok nung züngsem lir ta bilemer. Iba telok yagi Islamic State kiralongrar telok den tezüngzüktep ka agiba sülen nungi Indonesia nung bomb lendong aika agüja arudar.

Amongnü Makassar nung Tenla ki amaker rongnung

katibo 2019 küm Philippine province kübok Sulu nung Our Lady of Mount Carmel Arogo Tenla ki amakba nunga shilem agia lir ta melung melemi bilemer; iba lendong nungji nisung 23 pokseta liasü, ta Indonesia National Police tongti, Listyo Sigit Prabowo-i metetdaksü.

January 6, 2021 nü Makassar nung police counter-terrorism squad-i kiralongrar ana khaset aser 19 pua liasü, aser parnokji Jemaah Anshorut Daulah telok nung züngsemtem lir.

Easter Sunday atongtsü hopta ka lia Muslim nung nütsüing timba aliba linük (Indonesia) nung Palm Sunday nü Khristantem amak; yaküm December ita nung Indonesia nung Jemmaah Islamiyah lenir, Aris Sumarsono (Zulkarnaen) apuba sülen nungi tensa majungba ajanga sepaitem aser police tem kanga yakyaka lir. Jemaah Islamiyah telok ya kiralongrar telok ka, ta linük aikati sangdongogo.

Palm Sunday nü amakba tatalokba linük Tir, Joko Widodo-i aitsüogo, ajisiüaka pai iba ya tamangba yimsü nung ajemdaker inyakba mapa ka masü, kechiyong tamangba yimsü ajaki kiralongra mapatem magizükteter, ta ashi.

ANO GO ABEN TSÜNGREM DEN

Kotak pa talidak

"Yamaji parnok den jembir külen, Kibuba Yisu kotaki anir atu, aser Tsüngrem tachijilen amen."
(Mark 16:19)

Yisu Khristaji Tsüngrem Chir ta kuli tajangjaji Pa tasü nungi shia arur pei talidaki anir atu. Yisu kotaki anir atuba ya tongtipang tatalokba ser nung asenoki iba temaitsü ta Palm Sunday, Good Friday mesüra Easter Sunday ama reta mamunger. Saka Yisu kotaki ayipa anir atuba ya tongtipang tatalokba ka lir.

Kechiba Yisu kotaki ayipa anit atu? Kuli kar itemi Mezüngbuba nung, kotakji pa talidak, aser Tebu den maneni longjema alitsü atema pa ayipa atu. Tanabuba nung, kotakji asenok pa chirtem ajak Khrista den longjemtsüba tesem ka lir. Iba asoshi asenok tanela nung renema atar. Kechiba asenok tashi anga, meshiteta, tanela renemshia iba lima nung ali? Kechiyong asenok khenü anogo Kibuba den kotak nung külemi alitsü aji asen teimla. Tasembuba nung, tebui pa mapang tatsüka asoshi tenyai yokba dang liasü. Pa tekümtet mapa renemer kotaki ayipa anir atu. Tanü tamanger shia asoshi teimlaji khenü anogo kodang iba lima timtem ajak südir Yisu den pa talidak nung pelatepa ajuruteptsü. Pa ayipa mao asübo iba teimla makala.

Sarasadem

Kibuba Yisu na kotak nung lir, saka ne tanela onok den teti dena lir. Khenü onok ne den longjemtsü yimla atar. Amen

Pak nung Khristantemi tasüba temerenshi obendang anema nokdaker

March 29, 2021: Pakistan ashiba agi, Tsüngrem nung meimchir temeden atema inyaker Khristantemi court tem dang

Tsüngrem mezüngmeshiba ken o nung aija tasüba temerenshi obendang agütsüba ajakbo magizüksüla, ta mepishiogo, ta Union of Catholic Asian News (UCAN)-i metetdaksü.

Taoba hopta Peshawar High Court bench-i Pakistan attorney general aser provincial advocate general dang Tsüngrem mezüngmeshiba ken o nung aitsürtem nem tasüba temerenshi dang agütsütsü atema akhangbaji tagizük ta metetdakja liasü.

Temepishiba ken o agütsüri

mezüngmeshiba ken o nung aitsürtem nem temerenshi balala agütsütsü benokbaji Federal Shariat Court-i agizükogo saka federal mesüra provincial sorkartemi benoka meinyaker.

Centre of Legal Aid Assistance and Settlement (CLASS) Director, Nasir Saeed-i, "Tsüngrem mezüngmeshiba ozüing tim mesüi amshiba anentsü mapang tongogo. Nisung kar mesüra telok kari parnok tebilemba ataloktsü mesüra mangyangtsü atema minorities anema iba ozüing ya tim mesüi amshir," ta ashi.

Haryana nunga anti-conversion ozüing benoktsü

March 29, 2021: India kübok state aika nung anti-conversion ozüing benokba sülen Haryana nunga sorkari anti-conversion ozüing ka benoktsü, ta sangdongogo.

Haryana nung iba ozüing benokba ajanga state nung Khristantem ano taliba reshikangshitsüa akok, ta Khristantemi tsübua bilemer. Tawa osangbenertem den jembidang Haryana Home Minister, Anil Vij-i, state nung anti-conversion ozüing ka benoktsü atema pai ketdangsertem dang ozüing draft süang ta tuyuogo, ta metetdaksü.

Drafting committee senden nung jembidang Home Minister-

i, "Iba ozüing benokba ajanga tashiyim amshia tamangba yimsü meyipdaksüba, mesüzüka tamangba yimsü meyipdaksüba, kibong akümba ajanga meyipdaksüba mesüra tanga lenmang balala ajanga tamangba yimsü meyipdaksüba nokdangtsü," ta metetdaksü.

"Iba ozüing alema aibelenertem nem temerenshi tulu agütsütsü," ta Home Minister-i metetdaksü.

India nung tang anti-conversion ozüing benoka aliba state temji Odisha, Uttar Pradesh, Arunachal Pradesh, Chhattisgarh, Gujarat, Jharkhand, Himachal Pradesh, Madhya Pradesh aser Uttarakhand state tem lir.



Wayanad, March 29, 2021: Hombarnü Wayawand (Kerala) nung District collector Dr. Adeela Abdulla-i 'Election duty Robot vote Kunhappan' tenzüksüba noksa nung angur. Iba ya Wayanad Engineering college nungi kaketshirtemi yanglu. Kasa noksa nung Engineering college principal Dr Anitha-a angur.

India nung Covid case million 12 jungogo aser 1,61,843 süogo

New Delhi, Metsüremi/ March 29 (Agencies): India linük nung ano nisung 68,020 dak coronavirus tashidak putetogo aser iba tashidak agi nisung 291 süogo, ta Amongnü Union Health Ministry-i metetdaksü.

Yaküm October 11 nü nisung 74,383 dak coronavirus tashidak putetba sülenbo anogo ka kija nung tang nisung timba dak iba tashidak puteter.

Linük nung coronavirus case ajak agi 1,20,39,644 (million 12) jungogo aser iba tashidak agi asür ajak agi 1,61,843 jungogo.

Tesüiba anogo 19 tashi India nung anogo shia nisung timba-

timba dak coronavirus tashidak puteta arudar, aser tang iba tashidak agi teshirangdakpur 5,21,808 lir; linük nung iba tashidak agi shiranger anepba shilem ano tajemba küma 94.32% dang kümogo.

Tesüiba ghonda 24 tsüngda iba tashidak agi nisung 291 asü aser iba nungji Maharashtra nung nisung 108 asüba, Punjab nung 69, Chhattisgarh nung 15, Kerala nung 12, Karnataka nunga 12, Madhya Pradesh nung 11 aser Tamil Nadu nunga nisung 11 asüba densema lir.

Linük nung iba tashidak agi nisung timba asüba state ji

Maharashtra (54,181) lir, iba sülen Tamil Nadu (12,670), Karnataka (12,504), Delhi (11,006), West Bengal (10,324), Uttar Pradesh (8,786), Andhra Pradesh (7,205) aser Punjab (6,690) state tem lir.

Linük nung iba tashidak agi shiranger 1,13,55,993 anepogo aser iba tashidak agi shirangertem asüba shilembo 1.34 dang kümogo.

Indian Council for Medical Research-i ashiba agi, March 28 tashi nung samples ajak agi 24,18,64,161 tendangogo aser iba nungji Honibarnü samples 9,13,319 tendangba densema lir.

DMK-i takok ngura CAA memelatsü: M K Stalin

Jolarpat, March 29 (Agencies): Hombarnü DMK Tir, M K Stalin-i, par party-i assembly election nung takok ngura Tamil Nadu nungbo Citizenship (Amendment) Act memelatsü, ta metetdaksü.

CAA onük nung Parliament nung AIADMK-i BJP pusemba atema aija pai, Parliament nung AIADMK aser PMK züngsemi iba bill anema nokdak asü nungbo CAA ya magizüki lila; linük

nung minorities timtemba atema party ana nemji tai tongloksütsü, ta ashi.

Jolarpat nung election sentong ka nung jembidang Stalin-i, par party-i CAA anema longkak aitba dang masü saka CAA anema signature campaign-a ayongzüka agiogo, ta ashi.

"Onoki sorkar akümtsü, iba nungji tarendaksü kecha mali. Anungji onoki sorkar akümba sülen Tamil Nadu nungbo CAA

ya memelatsü. Stalin-i ibaji nangzüker," ta pai ashi.

Arrla 370 agienba aser Triple Talaq anentsüba onük nung Centre nung AIADMK-i BJP pusema liasü, ajisüaka tangbo parnoki parnok ya minorities kümzükertem ama sayur, ta pai aitsü.

Aluyimba ozüng tasen asem anema state assembly nung bangzüng merenemba atema pai Chief Minister, K Palaniswami-a aitsü.



Belagavi (Karnataka), March 29, 2021: Hombarnü Belagavi Lok Sabha constituency by election nung tokteptsü atema taoba mapang Minister aser tang Karnataka Pradesh Congress Committee (KPCC) nung Working President, Sathish Jarkiholi-i tenüng agütsüba noksa nung angur. Kasa noksa nung taoba mapang Chief Minister Siddaramaiah aser KPCC president D K Shivkumar nata angur.

Linük Tir Ram Nath Kovind-i NCT Delhi (Amendment) Bill agizükogo

New Delhi, March 29 (Agencies): AAP tongti lenir aser Delhi Chief Minister, Arvind Kejriwal jenjang majungtsüsa linük Tir, Ram Nath Kovind-i National Capital Territory of Delhi (Amendment) Bill 2021 agizükogo.

Iba Bill ajanga ashiba agi, Delhi nung 'sorkar' tetezü Lieutenant Governor' lir, aser iba bill ajanga Delhi LG nem tashi tulu agütsür.

Taoba hopta Parliament house anaprongla nung iba bill agizüka liasü; March 22 nü Lok Sabha nung agizük aser March 24 nü Rajya Sabha nung iba Bill agizük.

Tang Delhi nung ruling party- Aam Aadmi Party (AAP)-i iba Bill anema nokdaka aser chief minister, Arvind Kejriwal-i, iba Bill ajanga BJP-i democracy raksatsür, ta jembia liasü.

Kerala Chief Minister, Pinarayi Vijayan-ia iba Bill anema jembi aser iba dak

sendakba nung Delhi chief minister-i twitter ajanga Kerala CM Pinarayi Vijayan dang pelaba lemsatepa, "BJP-i democracy raksatsüba anema Delhi nüburtem pusemba atema nü Pinarayi Vijayan dang pelar," ta metetdaksü.

Tamalen Vijayan-i, "NCT of Delhi (Amendment) Bill ya asen linük federal inyakyim aser state tem temeden anema lir. Democratic inyakyim nung shimtetba state sorkartem tashi nokdangba aser Supreme Court obendang alema inyakba ya anentsüla. BJP dak akhi mapang yimsüsüba (British nunger yimsüsüba) melungsentsü lir," ta jembia liasü.

2018 küm July ita nung Supreme Court-i obendang ka ajanga, Delhi sorkari agiba telemtetba ajak nung Lieutenant Governor-i tiyongtsüi aitsü makok aser pai council of ministers den angatettepa inyaktsüla, ta metetdakja liasü.

Maharashtra nung Maoists telungpur 5 khaset

Mumbai, March 29 (Agencies): Hombar anepdang Maharashtra kübok Gadchiroli district nung police-i Maoists telungpurtem mita aoba mapang nung tetsür ana densema telungpur pongu tepsetogo, ta police ketdangser kati metetdaksü.

"Gadchiroli kübok Khobramenda arem nung telungpur mita aoba mapang nung telungpur pongu tepsetogo," ta pai metetdaksü.

Honibarnü-a district police-i prangpong ka den pressure cooker bomb asem nguteta liasü; Maoists telungpurtemi

itemjji amshia security sepaitem amaktsü sentong liasü.

'Naxal week' amongtsü atema Khobramenda arem nung telungpur aika adenshidar, ta osang ka angashiba nung ajemdaker Gadchiroli nung police C-60 commandos-i Honibar nungi tenzüka telungpurtem mita ao.

C-60 commandos dak telungpur 60 dak temai injang khaloktsüba nungi parnok tsüngda khatepa tenzüka liasü. Ghonda ka shi khatepba sülen telungpurtem ajen, ta police-i metetdaksü.

Sopore nung Municipal councillor aser security guard na khaset

Srinagar, Metsüremi/March 29 (Agencies): Hombarnü Jammu & Kashmir nung Baramulla district kübok Sopore area nung municipality office kima kiralongrartemi amakba mapang nung block development council (BDC) züngsem ka aser pa indang security guard ka na khasetogo, ta police osang ka ajanga metetdaksü.

Kiralongrartemi BDC züngsem, Reyaz Ahmad aser pa indang security guard, Shafat Ahmad na dak injang khaloktsü aser tenaprong iba tesem nungjisa asü; iba dak alia civilian kata yiruogo, ta police ketdangser kati metetdaksü.

Inspector General of Police (Kashmir Zone), Vijay Kumar-i iba tesemji semdangba sülen tongti sepaitem den senden ka ayonga menogo.

Senden nung Kumar-i tongti nisungtem atema security lemzüksüba police pezü mapa nungi anenja alitsü tuyuba den külemi kiralongrartemi injang khaloktsüba mapang nung par pezü kechi süa liasüar ibaji jungjunga bushisüngdangtsüla, ta tuyu.

Police ketdangser kati ashiba agi, mezüng bushisüngdang ajangabo Lashkar-e-Taiba telok nungi lisopur, Mudasir Pandit aser bendanger kiralongrar ka nati amak ta bushitetogo.

"Iba tesem nungji tongtibang nisungtem kümzüksü atema lemzüksüba police pezüi junga meinyak, ta shia IGP-i SSP (Senior Superintendent of Police) Sopore dang police pezüji mapa nungi anenja atatsü tuyuogo," ta ketdangserisa metetdaksü.

Tenokdangba agütsüba ajanga nuclear power plant shibangtsü akok: Iran

Tehran, Metsüremi/March 29 (Agencies): Tenokdangba agütsür aliba ajanga linük nung nuclear power plant inyaksangshi mejungi kümogo aser takümbo shibangtsü akok, ta Iran-i ashi.

Bushehr nuclear power station shibangtsü ana nung lir, kechiyong US-i bank inyakyim nung tenokdangba agütsür aliba ajanga Islamic Republic, sen tsütateptsü aser tenüngdakba oset alitsü asoshi tasak kümogo, ta Atomic Energy Organization of Iran nung deputy, Mahmoud Jafari-i ashiba semi-official Iranian Students' News Agency sangdong ka ajanga metetdaksü.

"Currency jenjang melenshia aliba aser bank inyakyim dak sendakba nung tetsükdaksü aliba ajanga reactor anepalutsü aser inyaksangshitsü atema sen intokba nung inyakyim tebenja kümogo aser Russia nunger contractor nem taa agütsüba nung tetsükdaksü adoker," ta Jafari-i ashi.

Bushehr ya Russia-i yanglutsü aser 2011 küm nung inyaksangshia arudar. Iba power plant ya Middle East nung civilian nuclear power plants tejentiba rongnung ka aser United Nations atomic watchdog-i iba power plant ya lendong aketba ama

mezüngshir. Iran nung electricity timba natural gas ajanga adokdaksür.

Russia-i kasa tesem nung 1-gigawatt nuclear reactors ana yanglutsü atema Iran den tenangzüktepba yangluogo koba USD billion 10 alang asütsü.

UK-i tenokdangba kar salatsür

London, Metsüremi/March 29 (Agencies): England nung Covid-19 tashidak prokshia aoba nokdangtsü atema tenokdangba agütsür aliba Hombarnü tang agi tanebenbuba salatsüogo. Vaccine takok ngua agiyonga aoba sülen iba jenjang agi, ajisüaka sorkari nüburtem dang kümdanga alitsü mepeshia metetdaksüogo, kechiyong Europe nung ano coronavirus wave tasen ka pokteter lir.

March 8 nü school tem lapoktsüba sülen, England nung kidang nungi mainshitsü atema tetuyuba agütsü aliba salatsüogo aser nisung trok mesera kibong ana kima adenshia kazütsü asoshi temelaba agütsüogo.

Tawa tenokdangba agütsür aliba mapang Premier League football amala tongtiband asayamungtem terpranger medeni odang asayadaksüogo, aser tang tetuyuba tasenba kübok amateur team sports den tennis, golf, basketball aser

kima tzüwaba amala asayatema asayatsü temelaba agütsüogo.

Ato Kilonser Boris Johnson-i Hombarnü iba tetuyuba tasen agütsüba ajanga linük nung saisapong tenzükshitsü imlaba lemsatop aser nüburtem pei teammate tem den ajurutepa parnoki meimba asayatem nung shilem agitettsü, ta ashi.

Ajisüaka Twitter nung video osang ka prokshiba nung pai nüburtem dang parnok nem nüjiso agütsüba kanga kümdanga amshitsü mepeshi.

"Tang tashi nung ajangteter alibatam amajok mekümdaksütsü atema talila minyaksü kanga tongtibang lir," ta Johnson-i ashi.

"Imlibilema özüng tasenba sülen kanga kümdanga anidakang, aji ta asünung dang asenok taoba mapang inyaksangshi dangi meyipa otettsü," ta pai ashi.

England nung April 12 nü ano inyakyimtem salatsüba mapang sorkari kima pub tem nung yi ajemtsü, kou mejipdak aser non-essential retail tem lapoktsü atema temelaba agütsütsü sentong lir.

Maneni May tom nungi kilong nung nüburtem adenshitsu asoshi temelaba agütsütsü aser tanga tenokdangba agütsür alibatam tensa dang jungra June 21 nü nungi salatsütsü sorkar sentong lir.



Coronavirus tashidak prokshia aoba nokdangtsü mechi Marikina city, Philippines nung ketdangsürtemi protective suits agir mesen tepsetba mozü azükba mapang tangokba noksa yangi angur. Philippine ketdangsürtemi nisung million 25 aliba Metropolitan Manila aser anasa aliba province pezü nung Hombarnü lockdown benokogo. Hombarnü Philippines nung COVID-19 cases tasen 10,000 dak tema liasü, ta Department of Health ajanga ashir.

COVID-19: Mexico nung sangdongba dang nungi timba lir

Mexico City, Metsüremi/March 29 (Agencies): Mexico nung coronavirus tashidak tenzükba sülen iba tashidak agi nisung 294,000 dak tema asüba tejangja lir, ta sorkar tasenbai sayur, anungji iba linük nung COVID-19 agi asürtem ya kanga agi tajemba nung züngshia aru, ta sayur.

Taküm March 15 tashinung coronavirus tashidak den sendaktepa Mexico nung nisung 294,287 asüba indang kulitem sayur.

Ibaji taoba mapang sangdonga aliba dang nungi shilem 61.4 agi timba lir, kechiaser sorkar tejenbai nisung 182,301 süogo, ta sangdonga liasü.

Ketdangsürtemi azüngba dang nungi kanga agi timba COVID-19 agi süa alitsü akok, kechiaser linük nung iba tashidak tendangba agi anünga lir, ta Mexico sorkari shia arua liasü.

2021 küm hopta trok buba tashinung iba tashidak wara agi Mexico nung asür nisung 417,002 alitsü, ta data tasenba agi sayur.

Taoba hopta coronavirus dak sendakba nung asür nisung 200,000 alemogo, ta sorkari sangdonga liasü, aser ibaji alima nung United States aser Brazil sülen timtiba asüba jenjang tasembuba nung alitsü.

Mexico nung nüburtem nem agütsütsü asoshi mozü bushiba nunga timtem ajurua aru.

Ita tetenzüklen US sorkari vaccination maparen nung

yaritsü atema Mexico nem AstraZeneca vaccine doses million 2.7 aputsütsü, ta sangdong.

Taoba hopta Mexican Foreign Minister Marcelo Ebrard-i Twitter nung, mozü doses ajak ya April 1 tashinung tonga arutsü imlar, ta shia liasü.

"COVID-19 anema Tir Biden sorkar nungi iba ama teyari tulu agütsüba ya Mexico-i pelashishia agizüker," ta pai ashi.

Tir Andres Manuel Lopez Obrador, shiba iba virus nungi taneptsü ngua ali, pai lockdown ka benoktsü mera arrsanga magiba aser sentong kar nung dang mask ka agiba asoshi aija arur.

Left-wing populist, shirnok nüburtemi tenük sünga agizüker, parnokibo Latin America nung mozü agütsüba maparen mezüng tenzükba rongnung Mexico sorkar ya ka lir, ta ashir, shirnok December 24 nü tenzuka liasü.

Nütsüng yongsük million 126 aliba linük, Mexico nung tang tashinung coronavirus mozü doses million 6.1 shi agüja lir.

"Nüburtem nem shidakba mozü agütsütsü asoshi asenoki ita ka nung mozü million 10 nüngdaker," ta epidemiologist Alejandro Macias-i osangbener dang ashi.

Honibarnü taoba Tir Felipe Calderon-i Twitter nung, Mexico nunger nisung 400,000 dak tema süogo, koba taoba küm dang nungi timba...aser alima nunga timba alitsü, ta sangdonga liasü.

Bangladesh azüdokshi nung nisung ana asü

Dhaka, Metsüremi/March 29 (Agencies): Longkak aiter aser Bangladesh police tsünga Deobarnü raratepba mapang nisung ana asü, aser ibaji ajanga India nunger Hindu yimsü akhanga amangba leniri linük semdangba sülen tamangba yimsü tsütsü longkak aitba mapang asür nisung 13 jungogp, ta ketdangsürtemi ashi.

Tamangba yimsü kanga metsünga-reta amshiba telok, Hefazat-e-Islam nungi timba sür longkak aiterem ya Bangladesh nüjiso ngur küm 50 ajungba mapang India Ato Kilonser Narendra Modi-i semdangba asoshi mepela aser par linük nung Muslim nunger anema azüdokshitsü asoshi ajungmesor, ta aitsür.

Nütsüng yongsük million 168 aliba Bangladesh linük nungya Muslim nunger timba lir, aser iba linük kübok district tongtitem nung longkak aiter dak police temi injang khaloktsüba mapang Hokulbarnü nisung pongu asü aser tasüngji nisung trok asü.

Linük anüolen Brahmanbaria district kübok Sarail jila nung Deobarnü rongrong adoka alidak police temi injang khaloktsüba sülen arishi küm 19 tain ka aser arishi küm 23 tain ka asü, ta police odongtari osangbener dang ashi.

"Parnoki (longkak aiterem) highway police station ka lungbanga yangji mi senloktsü aser police 35 shi yirutsü. Police temi pei kumzüksü atema injang khaloktsü," ta odongtari ashi. Saka nisung ana ya police temi khasetba asü masüar mashi.

Pai ashiba agi, Hefazat busemer timba sür longkak aiter 3,000 shi arua highway mokdang aser police dak longru aser long agi aon.

Bangladesh Home Minister Asaduzzaman Khan-i longkak aitba anentsü ajungshi.

"Sepaitemi tarenzükba nung repranga atar. Ibai manenra

nüngdakba mera agitsüla, ta onoki bilemer," ta Khan-i osangbener dang Deobarnü shia liasü.

Deobarnü linük yimtiba, Dhaka anasa Narayanganj tesem nung Hafazat busemertem noklang aika adenshia lenmang nung kidang osettsüset aser tyre tem arong aser ketdangsürtem dang nisung khasetba bushisüngdangtsü takhangba agüja liasü.

Dhaka nungi Chittagong-i passenger bener aoba train ka nung Hefazat busemertemi amakdang nisung ter yiru, ta osang ka ajanga ashi.



North Karen state nung aliba Papun district kübok Deh Bu Noh tesem nung Myanmar mitkartemi tayimtsü amshia amakba mapang Karen yimtsüng nung alirtem arem nung atsüka aliba noksa ka yangi angur. Myanmar mitkartemi tayimtsü amshia amakba tetsübu agi ajenba ethnic Karen yimtaklirtem ya arrtsü alema Thailand-i aittsü südi, ta temolung melemteti Thai ketdangsürtem arrtsü nung renemshia lir.

DDLSA aser CHILDLINE Dimapur ajanga workshop sentong ayongzük



Dimapur, Metsüremi/March 29, 2021: Hombarnü, DC Conference Hall Dimapur nung GB's aser Council Chairman atema DDLSA aser CHILDLINE Dimapur ajanga ayongba workshop sentong nung Boduve Peter Resu, Judicial Magistrate-i telok den jembiba yangi angur.

Dimapur, Metsüremi/March 29, 2021 (TYO): GB Union Sadar Dimapur aser Dimapur Urban Council Chairmen Federation kübok GB's aser Council Chairman atema Hombarnü (29.03.2021) DC Conference Hall Dimapur nung, Protection of Children from Sexual Offences Act 2012 aser Juvenile Justice Act 2015 nung workshop sentong ka ayonga agiogo, ta sangdong ajanga metetdaksü.

Dimapur District Legal Services Authority aser CHILDLINE Dimapur longjemmer iba workshop sentong ayongzük, kong shisalen sayurji Shri Boduve Peter Resu, Judicial Magistrate First Class Dimapur aser Miss Lozua Kape, Centre Coordinator CHILDLINE Dimapur na liasü.

Iba workshop ya session ana lemsar agi. Mezüng session nung Shri Boduve Resu-i POCSO Act 2012 aser iba act kübok section aser provision balala indang telok dang metetpeladaksü.

Pai, asen lokti nung tanurtem lendong nungi kümzüka ayutsü aser parnok tim lenmang nung anitettsü asoshi taintemi tongti shilem agitsü indang rasa jembi.

Iba den külemi, mapa tamajung nungi/tim masüba inyakyim nungi tanurtem kümzüka ayutsü aser parnok nem agütsüba temeden meraksadaksüi teküzmük agütsütsü asoshi lokti lennir GB's aser Council Chairman temi khuret bena shilem tulu agitsüla, ta pai shisem.

Tanabuba session nung, Lozua Kape , Centre Coordinator

CHILDLINE Dimapur-i, CHILDLINE 1098 inyakyim aser nükjidong tem indang tongmelang agi telok dang metetdaksü aser CHILDLINE Dimapur ajanga bushisüngdangba mapang tanurtem mejungi benschiba maparen kar ajangshia aruba indang medemdanga lai telok den jembia liasü.

Laisa, Ward/Colony level Child Protection Committee tem indang metetpelatsü aser item committee inyakyim, mapatong den nükjidong indang telok dang metetdaksüogo.

Kasa sentong nung, K.Ela, Collab Director CHILDLINE Dimapur-i, khuret anenba senso tajung ka ama shitak ajiteta inyaksü aser tanur kar danga tim mesüi amshiba ngura mesüra osang angazükra, tim ketdangsürtem dang metetdaksütsüla ta ashi.

Iba workshop sentong nung adener ajak dang lai pelaba metetdaksü aser shisalen sayuri tekümdangtsü agutsüba tem angazükba dang mesüdaksüi, pei pei tata colony nung nübur tulu tila ajak dang iba osang sangoktsütsü aser mapa kuma benschitsü asoshi lai mepishia liasü.

Tarutsü anogotem nung, tanurtem nem teküzmüktsü agütsütsü asoshi colony ajak nung mapatong balala ajanga telangzüba tajung den iba maparen nung amalitepa inyaka aotsü CHILDLINE-i imlaa atar, ta lai ashi.

Iba workshop sentong nung Neiketulie Namdau, Nodal Coordinator CHILDLINE menden liasü.

Sür Küm Ka Ajungba Menungra Bilemteter Late Mrs. Tiamongla. 30.03.2020

Nü tebur tajung, terajem shiasatsü, nü temeim mapatem, onoki kodanga amatsü makok.

Tanü na onok den meliaka, onok mulungjang nung aser ozü nükla nung teti na lir.

Temeim kinungbo, jala aser kinungertem.

OFFICE OF THE
LANGPANGKONG TZUKONG MUNGDANG

H.Q. Chuchuyimlang - 798614
Dist. Mokokchung, Nagaland
ESTD.1933

LTM Sanen Luden Senden Ayonger
Langpangkong Tzükong Mungdang 43 Buba inti Lokti senden asoshi aser tanga rongdak nungdak jembitsü asoshi LTM Sanen Luden Senden ka, 06/04/2021 anogo, 11:00 Ako nungi tenzüka LTM Salang, Chuchuyimlang Town nung amentsü.

Anungji Sanen Luden züngsemtem ajak iba anogo nung aruagi adentsü sangdonger.

Sd/-
M. Zulu Ozukum
Tir, Ltm

Sd/-
Watitoshi
Repsem Zülur, LTM

'Bob and Amy' nung Anna denogo



6,000mAh Battery aketba Realme C25 saya

New Delhi, Metsüremi/March 29, 2021 (Agencies): Realme-i company indang budget C-series nung 'Realme C25' bendenlokba sangdongogo. Iba smartphone ya Realme C21 den külemi Indonesia nung sayaogo, koba March tetenzüklen Malaysia nung mezüng saya liasü.

Realme C25 tesülen triple camera aser tejaklen selfie camera atema waterdrop-style notch dena lir.

Iba phone nung MediaTek processor inoka yanglutsüogo aser device ya sentsü ana nung angutsü. Tanga shishilembadak iba smartphone angutsü asoshi osang tejangja ka agüja mali, saka iba dak sendakba nung Realme-i yakta osang agütsütsü imlar.

Specification tsütsü reprangdangra, Realme C25 nung 6.5-inch HD+ (720×1,600 pixels) display den 20:9 aspect

ratio aser 480nits peak brightness dena lir. Phone nung octa-core MediaTek Helio G70 chipset den ARM Mali-G52 GPU aser 4GB LPDDR4X RAM ajanga maparen achaayangtsür. Iba den külemi, C25' nung 64GB aser 128GB onboard storage angutsü, koba memory ulua aginürtemi microSD card ka ajanga atsülanga amshitettsü.

Realme C25 ya Android 11-based Realme UI 2.0 out-of-the-box ajanga nungittsü aser dual-Nano SIM card support asür. Iba smartphone tesülen triple camera system ya square-shaped module nung angutsü, kong 48-megapixel primary camera den f/1.8 aperture, 2-megapixel monochrome camera ka aser f/2.4 aperture den 2-megapixel macro shooter angutsü. Selfie aser video calling atema, phone tejaklen 8-megapixel camera

sensor den f/2.0 aperture keta lir. Camera inyakyim tsütsü nungittsü atema, iba camera app nung mode talisa HDR, panoramic view, portrait, time-lapse, slo-mo, nightscape aser tanga aika angutsü. Iba primary camera yagi 60fps nung Full-HD video record süteter.

Tanga feature tsütsü reprangdangra, Realme C25 nung 4G LTE, Wi-Fi 802.11ac, Bluetooth v5.0, GPS/ A-GPS, Micro-USB, aser 3.5mm headphone jack ka keta aliba angutsü. Iba phone nung battery tasazük 6,000mAh lir aser 18W fast charging support asür. Realme-i ashiba agi, 'standard usage' nung anogo piyong atema battery yagi tashi agütsür. Iba den külemi, phone yagi Super Power Saving Mode support asür aser security atema tesülen fingerprint scanner ka angutsü.



NCA Tir aser Minister Neiba Kronu-i March 29 nü Heritage Kohima nung 1 8 b u b a Nagaland State C h e s s Championship tenzüksüba m a p a n g tangokba noksa nung angur.

New York, Metsüremi/ March 29, 2021 (Agencies): Taruba project - 'Bob and Amy' atema Joseph Mazzello den Anna Camp anisemogo.

Film yanglur David Hunt indang indie comedy nung arishi küm 37 tain actor Joseph aser arishi küm 38 tain actress Anna nati tongti shilem agitsü terenemba lir.

Iba movie ya music critic Bob (Mazzello) taküm otsü indang project ka alitsü.

Hunt, shibai Rodney Vaccaro-i züluba script ka nung ajemdaker direct asütsü, pai Patricia Heaton den longjemmer FourBoys Entertainment banner ajanga iba film produce asütsü. Joseph aser Anna na den

külemi Neil Flynn, Ryann Shane aser Nash Grier nungeri iba film nung shilem agiba angutsü.

'Pitch Perfect' trilogy nung Anna-i Aubrey Posen ama shilem agiba ajaki nguogo aser taoba küm lai iba franchise indang pezübuba installment nung külem cast den tanaben shilem agitsü yongyaba lemsatepogo.

Anna-i ashiba agi, "Onoki ano tatongtep (Pitch Perfect) film ka yangluner aser iba project maneni tejakleni bener aotsü asoshi onoki mulunga dang lir."

Iba film tangokba set nung Anna Kendrick, Rebel Wilson aser Brittany Snow densema co-stars den jangratema inyakba Anna-i lemsatepa liasü.

Mesekhrietuo & Seyievilie nati 4buba Sekrenyi Open Air Rifle Shooting tetoktepba kokogo



Kohima, Metsüremi/March 29 (TYO): Mesekhrietuo Khezhe & Seyievilie Mechülho nati 4buba Sekrenyi Open Air Rifle Shooting Competition kokogo. Iba tetoktepba ya Kohima Air Rifle Club-i ayongzüka D Khel Ground, Kohima village nung asayaa liasü.

March 29 nü tetoktepba kübok asaya ana asayaa liasü aser takokertem:

PCP (Pre-Charged Pneumatic): 1st- Mesekhrietuo Khezhe, 2nd- Menuobeilie Yiese aser 3rd- Seyievilie Mechülho

Break Barrel: 1st- Seyievilie

Mechülho, 2nd- Mesekhrietuo Khezhe aser 3rd- Vipunyü Khezhe.

Asayamung lapokba sentong nung D Khel Council, Kohima Village, Chairman Pele Khezhe alakteta jaoker liasü aser pai asaya nung shilem agirtem dang parnok tejangra iba asayamung nung dang tembanga metoktsüi state, national aser international jenjang tonga asayatsü atema nükjidong ayutsü ajungshia liasü.

"Nenok dak aketba sempet tajungtiba amshia takok tajung angutsü atema tazüokba nung bendanga agüja inyakang," ta

pai ashiba den asayartem dang pei kidang aser lokti nung saisapong yimya tajung maneni amshitsü ajungshi.

Mejeta jaoker ama Managing Director KOHIMAS Hospital Dr Tsielhoutuo-i asayamung shibangba sentong nung takokertem nem sempet lemja liasü.

Sentong nung o jembiba mapang pai asayamung ayongertem nem tenüngsang agütsü aser ashiba agi, iba asaya asoshi asojen, küm amala tenüngdakba balaka mali aser Naga nung asoshi tapet lir.

Paisa, asayartem dang iba asaya profession ama agitsü ajungshi.

Asayamung lapokba sentong Air Rifle Club tir Visasielie Suohu lenisüba kübok agi aser Baptist Mission Church Kohima deacon Noel Solo-i temoatsü meshia sarasadem. Kasa mapang nung Keneisenuo Sorhie ken tajung ka tena lokti ayongzü.

Jonathan Rongsen Morecambe CC nungi asayatsü



Dimapur, Metsüremi/March 29 (TYO): Nagaland Cricket Team captain, Jonathan Rongsen Longkumer, United Kingdom (UK) nung amendaker aliba cricket club Morecambe CC nungi 2021 season asayatsü atema tenangzüktepba ka yangluogo.

Iba osang sangdongba mapang Morecambe Cricket Club-i, "Rongsen ya asayar tejen ka lir aser pai ball dena onteter, pa tang Ranji Trophy nung Nagaland team nungi asayar aser Mitchel Van Buuren melena MCC nung adentsü," ta ashi.

Morecambe Cricket Club ya 1889 küm ngutet aser English cricket club tejentiba rongnung ka lir. Iba club ya United Kingdom (UK) kübok Morecambe, Lancashire nung amendaker asayar.

Arishi küm 34 tain Jonathan Rongsen ya Mokokchung district kübok Akhoya yimtsüing nungi lir aser pa ya all round; right-hand batsman aser medium pacer lir

Iba osang angazükba sülen Deputy CM Y Patton-i Twitter ajanga Jonathan nem tenüngsang agüja liasü. "Nagaland cricket team captain aser nisung aika ajunemsosang Jonathan Rongsen Longkumer, Morecambe Cricket Club nung adenba atema tenüngsang agütsü. Onok kanga nema atanger aser na asayaba reprangtsü yongyaa atar. Wadang tasen nung takok ngua aotsü imlaja atar," ta Deputy CM-i tweet asü.

Olympic test event nung bendanger asayartemi shilem agitettsü

Tokyo, Metsüremi/March 29 (Agencies): Tokyo 2020 Olympic Games masaya tsüingda international asayartem Olympic atema tetendanga asayamung ka nung shilem agitsü atema jaoktsü akok, ta asayamung ayongertemi Hombarnü metetdaksü.

Wara pokteter aliba mapang asayamung ayongertemi international asayamung ka ayongtsü lir anungji iba asayamung ya COVID-19 prokshia aoba nokdangtsü atema tetendanga ka ama ayonga asayatsü.

"Iba asayamung nung asayar kwi-i shilem agidaksütsü iba indang asatepdar. Asayamungi jaoktsüpurtem jangjaba sülen onoki sorkar den sendaktepa inyaktsü," ta Tokyo 2020 ketdangsür Yasuo Mori-i osangbenertem dang ashi.

Track & field aser marathon

densema asaya pongu nung asayartem tokteptsü atema bendanger asayartem janoktsü akok, ta asayamung ayongertemi ashi.

Coronavirus wara wave tanga ka poktetra tetendanga asayamung ya kechi koda asütsü ta asüngdanga mapang Games Delivery Officer Hidemasa Nakamura-i, iba ya domestic aser local coronavirus tensa den sendaktepa lir ta ashi.

Tokyo 2020 ayongertemi July 23 nü asayamung metenzük tsüingda tetendanga asayamung 18 ayongzüka asayatsü sentong lir. Wara ajanga mapanglem nung kongshiba agi April ita skateboarding aser shooting asayatem ayonga asayatsü aliba May itai belenerogo.

Olympic Torch relay taoba hopta tenzüokgo aser terprangertem dang mask

asemtsü, kati ka nungi pilaa nokdaksü aser milenbong amer asemertem ola adoka ajungmesotsü melena teka maa ajungmesotsü tetuyuba agütsüogo.

Tokyo 2020 ayongertemi iba asayamung reprangtsü atema bendanger marudaksütsü telemtetba agiogo. Iba telemtetba ya Japan nungertemi pelashishia agizükogo aser Asahi Shimbun-i taoba hopta bushitsüingdang ka agiba ajanga shilem agir 85%-i iba sentong agizükba sayuogo.

Kasa bushitsüingdang ajanga nüburtem shilem 36-ibo ano asayamung thinendaksünüba sayuogo aser kasa mapang nung shilem 33-ibo asayamung athitsü jangraba ngutetogo. Nüburtem shilem 27-i dang sentong yanglur aliba ama asayamung ayonga asayadaksüner.

Mkg nung 2buba sixer tennis ball tournament asayar



March 29 nü Imkongmeren Sports Complex nung 2nd Sixer Tennis Ball Tournament tenzüka Titans o Mulungnen telok na asayatsü mapang tangokba noksa nung angur. Mokokchung, March 29, 2021

Mokokchung, Metsüremi/March 29 (TYO): 2nd Sixer Tennis Ball Tournament ta sür asayamung ka March 29 nungi tenzüka Agile Willows Cricket Club-i yangi Imkongmeren Sports Complex Mokokchung nung ayongzüka kadaki.

Taküm iba asayamung nung

telok 13-i shilem agidaki. Shibai tematiba jenjang ngudir par telok nem 15,000/- aser tanabuba jenjang nem 8,000/- agütsütsü. Iba den jurila senpet (individual prize) kar shima agütsütsü tayongertem tebilemba lir. Iba asayamung ya March 31 tashi asayatsü.

Thisara Perera-i over ka nung six trok azük

Metsüremi/March 29, 2021 (Agencies): All-rounder Thisara Perera ya Sri Lanka nung asayartem rongnungi professional cricket nung over ka nung six trok azükba mezüngbuba asayar kümogo. Colombo nung domestic asayamung ka asayaba mapang pai iba otsü tasen yanglu.

Arishi küm 31 tain Perera-i, Major Clubs Limited Over List A tournament nung Sri Lanka Army aser Bloomfield Cricket and Athletic Club na asayaba mapang iba alizüing tongtet. Iba asaya nung pai ball 13 nung run 52 yanglu, koba Deobarnü Panagoda jila kübok Army Ground nung asayaa liasü.

Iba asaya nung pai six ti azük aser List A cricket nung Sri Lanka nung asayartem

rongnungi half-century takaratiba yanglur rongnung pa tanabuba kümogo. Taoba Sri Lanka all-rounder Kaushalya Weeraratne-i 2005 küm ball 12 nung half-century yanglua lir.

Asaya nung ball 20 anunga lia Perera No 5buba nung bat asütsü ait. Part-time off-spinner Dilhan Cooray-i ball aonba mapang Perera-i ball ajak six züktok.

Over ka nung shi trok azükba asayartem rongnung Perera tekububa kümogo. Garfield Sobers, Ravi Shastri, Herschelle Gibbs, Yuvraj Singh, Ross Whiteley, Hazratullah Zazai, Leo Carter aser Kieron Pollard nungeria over ka nung six trok züka lir.

Perera-i tang tashi nung Test trok, ODI 166 aser T20 International 64 asayar lir.



March 29 nü Tening Village Local ground nung 2buba Tening Sub- Division football Tournament final asaya nung Ntu Youth Club-i goal 2-0 agi Native Feathers kokogo. Takokernem nem senpet sen 40.000 den takok marok aser kuli kakat agüja liasü. Iba asayamung ya Limelight Foundation Tening-i ayongzüka asaya.

BILEMDANGANG

"Tarutsü tia tajungba asütsü asoshi tanü meranga inyakang."